

Script of Morning Gojri News Bulletin 09 February 2025 at 1015Hrs

مارننگ گو جری نیوز بلیٹن مورخہ 09 فروری 2025

یوہ آکا شوانی جموں ہے باغ علی طاہر تیں خبر سُنو۔

Kathua WSS

گرائیں علاقہ مانہہ پانی غی سپلائی مانہہ بہتری لیان در کی جان آلی کو ششان غے تحت مرکزی وزیر ڈاکٹر جتندر سنگھ تے جل شکتی محکمہ غا وزیر جاوید احمد رانا نے جسروٹہ کٹھوعہ مانہہ 7 مرکزی پانی سپلائی سکیمیں غو افتتاح کیو ہے۔ ان پانی سپلائی سکیمیں غی تکمیل سنگ علاقہ غا 12 گرائیاں غی 15 ہزار 8 سو توں متی آبادی نانہہ پین غو صاف پانی دستیاب ہو سکے گو۔ ان پانی سپلائی سکیمیں غو 2 ہزار 5 سو 84 کُنباں نانہہ فائندو مل سکے گو۔ ان سکیمیں غے تحت اس علاقہ مانہہ ٹیوب ویل، پور ول تے پانی غا ٹینک تعمیر کیا جانے گا۔

Sakina Itoo

شیڈیول کا سٹ طبقہ غی سماجی تے اقتصادی ترقی در چایا جان آلا اک اہم قدم غے تحت سماجی بہبود تے تعلیم محکمہ غی وزیر سکینہ اٹو نے کل نوی دہلی مانہہ پر دھان منتری اُنو سچت جاتی آہی یو دے یو جنا غی مرکزی صلاحکار کمیٹی غی میٹنگ مانہہ شرکت کی۔ اس میٹنگ غی صدارت مرکزی وزیر ڈاکٹر ورندر کمار نے کی۔ میٹنگ غے دوران اس اسکیم غی پیش رفت غو جائزولین غے نال نال اس غا اثرات مانہہ توسیع غا امکانات وری غور کیو گیو۔ میٹنگ غے دوران سکینہ اٹو نے جموں کشمیر مانہہ اس اسکیم غی حصولیابیاں وری لہہ پائی گئی۔ جن مانہہ شمسی روشنی لان، 63 سمارٹ کلاسز تے 1 ہزار 7 سو 15 طالب علمیں نانہہ دتی جان آلی ہنر بارے تربیت شامل ہے۔ اُنہاں نے زمینی سطح وری ان سکیمیں مانہہ موثر طریقہ سنگ عملان غی ضرورت وری زور پایو۔

Infiltration Bid

گذشتہ جمع آلیے روز فوج نے کیری سیکٹر مانہہ کنٹرول لائن وری در اندازی غی اک بڑی کوشش مانہہ ناکام بنا دیو۔ آکاش وانی جموں غا مہارہ نمائندہ نے جانکا ری دیتاں وری دسیو ہے جے اک مختصر فائرنگ غا تبادلہ غے بعد ناکام بنائی گئی در اندازی غی اس کوشش

غے بعد فوج نے علاقہ مانہہ دہشت گردان غی تلاش غی خاطر اک بڑی کاروائی شروع کر دی۔ یوہ واقعہ اُس ولے پیش آیو جد معمول غی گشت ور جارہیا فوجی جواناں ور کنٹرول لائن غے نیڑے جنگل تیں فائرنگ کی گئی۔ فوجی جواناں نے فوراً اس فائرنگ جو جواب دتو، جس غے بعد ات مزید دستا روانہ کیا گیا، تے علاقہ مانہہ نقل و حرکت ور سخت نظر رکھی جا رہی ہے۔ اس غے بعد گذشتہ شام توڑی علاقہ مانہہ فائرنگ غا کسے واقع غی کوئی اطلاع نہیں، البتہ دہشت گردان غی تلاش جا رہی ہے، تے مزید تفصیلات غو انتظار ہے۔

CS Parshad

مذہبی سیاحت مانہہ فروغ دین تے بنیا دی ڈھانچہ مانہہ فروغ دین غی خاطر چیف سیکریٹری اٹل دلوئے محکمہ سیاحت غا افسراں غی اک میٹنگ غی صدارت کی۔ میٹنگ غے دوران جموں کشمیر مانہہ پراساد سکیم غے تحت جا رہی پروجیکٹاں غی پیش رفت غو جائزو لیو۔ میٹنگ مانہہ آئندہ مہا شورائری غا تہوار تیں پہلاں شو کھوڑی شرانن مانہہ تیاریاں مانہہ ترجیح دتی گئی۔ اس موقع ور جناب دلو نے کٹڑھ، اتر بینی، تے پرمنڈل مانہہ جا رہی پروجیکٹاں مانہہ تالان تکمیل ور زور پایو، تانجے سیلانیان مانہہ مزید بہتر سہولت مہیا کرائی جا سکیں۔ انہاں نے محکمہ سیاحت تے ثقافت مانہہ ہدایت کی ہے جے مقامی ہنر تے آرکی ٹیکچر مانہہ محفوظ رکھن مانہہ یقینی بناویں۔ میٹنگ غے دوران شو کھوڑی شرانن مانہہ بنیا دی ڈھانچہ غی سہولتاں مانہہ بابد کرن غے نال نال بہتر حفاظتی بندو بست ور زور دتو گیو۔

Agriculture Ramban

ذراعت مانہہ بابدو دین غی کوششاں غے تحت ضلع رام بن غا محکمہ ذراعت غی طرفوں ذراعت تے اس تیں منسلک کاروبار مانہہ بابدو دین غی خاطر جدید طریقہ کار تے تکنیکی امداد مہیا کرائی جا رہی ہے۔ ان کوششاں غے بشکار ضلع مانہہ مشروم غی پیداوار ہن توڑی سب توں متی ریکارڈ کی گئی ہے۔ جہیڑی محکمہ غی طرفوں بہتر صلاح مشورہ مہیا کران غے نال نال اس سلسلہ مانہہ کسانان مانہہ بہتر مارکیٹ تے پروسسنگ وغیرہ غی سہولت دین غی وجہ سنگ ممکن ہوئی ہے۔ مشروم غی بہتر پیدہ وار سنگ اس نال منسلک کسانان غی آمدنی مانہہ بہتری آئی ہے۔

Announcement

ریجنل نیوز یونٹ آکاش وانی جموں غی طرفوں کٹھوعہ ضلع واسطے عارضی نامہ نگار غا پینل غی خاطر درخواست منگی گئی ہیں۔ تجویز کردہ فارم وریہ درخواست 24 تیں 50 بہراں غی عمر غا ضلع کٹھوعہ غا بسنیک اُمید وار ریجنل نیوز یونٹ آکاش وانی جموں در دے سکیں۔ یہ اُمید وار ضلع صدر دفتر کٹھوعہ تیں 10 کلو میٹر غا دائرہ غے اندر رہا نش پزیر ہونا چاہیں۔ پی ٹی سی غا اُمید وار غی خاطر تعلیمی قابلیت پی جی ڈپلومہ یاہ صحافت مانہہ ڈگری یاہ فر کسے وی تسلیم شدہ یونیورسٹی تیں گریجویشن غے نال نال 2 بہراں غو صحافت مانہہ تجربو ہونو رکھیو گیو ہے۔ اس توں علاوہ کمپیوٹر تے ورڈ پروسنگ غی جانکاری نالے خبر اکھٹیں کرن آلا آلات غی جانکاری اور الیکٹرانک میڈیا مانہہ میڈیا کوریج غو تجربو رکھن آلا اُمید واراں نانہہ ترجیح دتی جا نیگی۔ خواہشمند اُمید واراں نانہہ کہیو گیو ہے جے وے تمام ضروری دستاویزات غے ہمراہ درخواست نیوز ہیڈ، ریجنل نیوز یونٹ آکاش وانی پنج تیرتھی جموں مانہہ آئندہ 15 فروری بروز بار توڑی دے سکیں۔ اس سلسلہ مانہہ مزید تفصیلی جانکاری غی خاطر مہاری ویب سائٹ

www.newsonair.gov.in

وروی رابطو کیو جا سکے۔

Weather

محکمہ موسمیات نے آج تیں آگلا 3 روز توڑی جموں کشمیر تے خاص کر وادی کشمیر مانہہ ہلکی بارشاں تے برفباری غی پیشنگوئی کی ہے، جت کل یعنی 10 تے آئندہ 11 فروری نانہہ بارشاں تے برفباری مانہہ تیزی آن غی اُمید ہے۔ اس غے بعد 12 تیں 14 فروری توڑی موسم صاف تے فر آئندہ 15 تے 16 فروری نانہہ موسم آبر آلود رہن غے نال نال گجھ علاقان مانہہ ہلکی بارشاں تے برفباری غی توقع کی جا رہی ہے۔ اس سال جنوری مہینہ غے دوران 87 فیصدی بارشاں تے برفباری مانہہ کمی دیکھی گئی ہے۔

اس غے نال ہی خبراں غو یوہ بلیٹن ختم ہوؤ۔